



來去東澳灣

頭擺人講：「手痛好過家，腳痛好繡花」，毋過，佢手術忒半個零月咁，手指還腫到像人家正灌好个煙腸樣仔，神經抽痛到分人牙研目皺、企坐毋核，去得哪位尋麼人過家寮好哪？佢還係手機仔拿出來滑滑啊，看這痛關愛仰仔來過，順續仔在面書過家寮就好哩。拿起手機仔，看著舊年去過个東澳灣，手痛仰會試著有較冗兜仔？

記得舊年熱天時節，細人仔講：「媽，暗晡夜來去逛夜市仔」。過半點鐘邊仔，該暗晡愛歇夜个民宿，佢兜就用手機仔定好咁；兩點鐘過後，佢兜就對臺灣个西片析，逛到臺灣个東片析來哩。

見擺來羅東夜市，都毋識去脣頭个羅東林業文化園區，難得日頭還宮落山就來到羅東，偲兜煞煞先行入園區來去，感想一下仔臺灣林業个歷史、看啊比偲兜較老个火車廂、火車頭。入夜咧，各人領好任務、鑽入人尖人个羅東夜市仔，買个買、看个看，乜係歇在臺灣个一種風景。蔥油餅、羊肉湯、一串心，管佢發風落雨抑係熱到會死，先尖入去排列仔就著咁。緊買緊食、緊行緊看，係旅行个一種趣味。

第二日食朝个時節，聽愛去粉鳥林漁港釣魚仔个人紹介，佢兜个車仔過駛往下，駛到離羅東夜市仔二十零公里外个東岳湧泉去。熱天來東岳湧泉搞，定著愛細義，這位个泉水當涼、日頭當烈，毋多知仔就會搞水搞到毋記得，毋多知仔就會分日頭晒傷。還過，脣頭攤仔个飛魚焙到忒香，毋多知仔就會害人困在樹下食到毋知飽，定著愛細義。

在東岳湧泉看橋頂高个火車歸排仔駛往下去花蓮、駛往上去宜蘭，有人情个來去、有時間个流轉，係一種靚靚个風景；在東岳湧泉外背，也就係靚靚个東澳灣。愛去東澳灣，會先經過四月到六月時節，校長煞猛做飛魚辣椒、飛魚乾義賣，來分學生仔出國去射箭比賽个東澳國小，看箭靶在運動坪脣排到到齊齊、企到正正，就像看得著泰雅族小朋友个汗水、聽得著佢兜个想望共樣。

東澳灣，有淨俐个海脣、恬靜个海面，海同天共色，係靚靚个天藍色。日頭當烈，偲行到海脣感受該難人个日頭、享受該淨俐个海風。海，仰會恁大又恁恬靜？日頭，仰會恁烈又晒到人一身鬆爽？想起做得過來去，分日珠享受、分身體感受，吾手都毋記得痛咧。

作者：彭瑞珠

☆詞彙學習☆

- 【東澳灣】dung' o van'：位於宜蘭縣南澳鄉蘇花路三段，北起烏巖角到南端烏石鼻。
【一串心】id' con xim'：又名豆腐卷，是蘭陽地區特有的小吃。
【牙研目皺】nga' ngien' mug' jiu：咬牙皺眉，痛苦的表情。
【東岳湧泉】dung' ngog iung' qien'：位於宜蘭蘇澳鄉、東澳國小旁邊。

☆文法學習☆

【緊行緊看】gin' hang' gin' kon：邊走邊看。緊 V 緊 V，表兩個動作同時進行。

例 1：你緊講緊噴口涎，還辣撈哦！（你邊說邊噴口水，好髒啊！）

例 2：佢緊行緊掄褲袋仔，紙票跌忒咁都毋知。（他邊走邊掄褲袋，鈔票掉了都不知道。）